

事物原會

事物原會卷三十一

海陽竹林人汪汲葵田氏消夏錄

日中爲市

前編燧人氏始作結繩之政立傳教之臺興交易之道炎帝之
世始列廬于國日中爲市致天下之民聚天下之貨交易而退
各得其所古史考神農作市高陽氏衰市官不修祝融修市古
今注陳貨鬻之物謂之肆置貨鬻之物謂之店風俗通人有所
鬻賣者于井上洗濯令潔乃到市故曰市井

貨幣

通鑑黃帝范金爲貨制金刀立五幣設九棘之利爲輕重之法
以制國用而貨幣行矣五幣者珠玉金刀布也董氏錢書有尊
盧氏幣其文作皇字見泉志音未詳以夏商幣攷之知爲尊盧幣也幣
字始此

錢

通考自太昊以來則有錢矣太昊氏高陽氏謂之金有熊氏高
辛氏謂之貨陶唐氏謂之泉商周謂之布藏曰錢行曰布齊莒謂之刀
名錢爲刀者以其利于民用也魯褒錢神論昔黃帝堯舜教民農桑以幣帛爲
本上智先學變通之乃掘銅山俯視仰觀鑄而爲錢內方象地

外圓象天物原軒轅造錢而無文國語周景王二十一年丁丑

改鑄大錢始有文名義考夾漈鄭氏云古錢其形如篆文一

變而爲刀器再變而爲圜法

太公立九府圜法在成王戊戌十三年一太府二玉府三內府四外

府五泉府六天府七職內八職歲九職幣

錢文載年號自宋孝武帝始其錢一邊文曰孝建一邊

四銖稱元寶自唐高祖始稱重寶自唐肅宗始稱通寶自宋人誤

讀開通錢文始改元更鑄自宋太宗始今制錢輕重大小倣唐

開通而文則襲宋人之誤讀也

楮鈔

稗史類編軒轅臣伯陵始以布帛爲楮幣漢武帝改制皮幣唐

事物原會 卷三十一
憲宗始置關子時呼爲飛錢宋孝宗改制會子元世祖始造交鈔明會典洪武初取桑穰爲鈔料以青色爲質外爲龍文花欄橫題其額曰大明通行寶鈔中圖鈔貫狀十串則爲一貫折銅錢一千文銀一兩每鈔四貫易赤金一兩凡稅課錢鈔兼收錢十之三鈔十之七一百文以上止用銅錢

土貢田賦

夏書禹別九州任土作貢如兗州貢漆絲織文青州貢鹽絺海錯之類定賦九等如兗州厥田惟中下厥賦貞青州厥田惟上下厥賦中上之類是制貢賦自陶唐氏始

商征

周禮地官有司市掌市之治教政刑量度禁令又有司關掌關貨之節以聯關市此關市商征所自始與

平糴法

列國衛李悝以平糴法進于魏文侯其畧曰穀貴傷民穀賤傷農平糴糴者豐歲必視上中下之熟以爲糴歉歲亦視大中小之饑以爲糴斂有餘而補不足行之魏必富強魏侯曰善此平糴之始漢人因之謂之常平卽與地官司稼觀年之上下出斂法同後人何得以此而攻周禮冒昧甚矣

徵比

周禮小司徒頒比法以行徵令疏云爲較比之法以索于民按
比校二字見國語

加耗

停驂錄加耗起于後唐明宗

鹽鐵稅

管子仲相齊置稅鹽官計一家男女所食之重斗加分强一强
二强而取之又置稅鐵官計所用器之重鉞加分强刀加六强
耜加七强而取之鹽鐵稅自此始

丁稅

漢書高帝十一年乙巳令諸侯王通侯常以十月朝獻及其郡民數率人歲六十三錢以給獻費丁稅自此始

以畝定稅

新唐書食貨志唐初授人以口分世業田取之以租庸調之法其用之也有節又云租庸調之法以人丁爲本自開元以後戶籍久不更造丁口轉死田畝賣易貧富升降不實其後國家後費無節自代宗時始以畝定稅而斂以夏秋

算舟車

綱目漢武帝元光六年壬子冬初算商車書初算商車則帝之
倍斂作俑可見至元狩四年壬戌並算舟矣

酒稅

綱目漢武帝天漢三年癸未春二月初權酒酤

魚課

漢宣帝時始收海租海租者魚課也從耿壽昌之請

契稅

隋志晉自過江至于梁陳凡貨賣奴婢馬牛田宅有文券者率
錢一萬輸估四百入官賣者三百買者一百無文券者隨物所

堪亦百分收四名爲散估歷代因之不廢宋太祖開寶二年己巳始收民印契錢此則專令買者輸錢矣

塘丁稅

通典齊武帝時王敬則以會稽士庶保塘餘課斂錢送入臺庫塘丁稅自此始

茶稅

通典唐德宗建中元年庚申納戶部侍郎趙贊議稅天下茶漆竹木十取一以爲常平本錢及出奉天乃悼悔下詔亟罷之至貞元九年癸酉春正月初復稅茶從鹽鐵使張滂之請也茶之

定稅自此始

房屋稅

通考唐德宗時軍用不給始稅開架算除陌其法屋二架爲閒
上閒錢二千中閒錢一千下閒錢五百匿一閒者杖六十告者
賞錢五萬

礬稅

翰苑新書宋眞宗咸平二年己亥命太子中允王子興復爲制
置淮南茶鹽是年令兼制置礬稅仍領荊湖路

牛具稅

續通考金制租稅之外名目細瑣不可殫述有牛頭稅卽牛具稅猛安謀克部女直戶所輸之稅也其制每來牛三頭爲一具

牙行稅

續通考元額外課有牙例明洪武初革罷官私牙行但收免牙錢一分

額外課

續通考元額外課凡三十有二曰歷日曰契本曰河泊曰山場曰窖冶曰房地租曰門攤曰池塘曰蒲葦曰食羊曰荻葦曰煤炭曰撞岸曰山查曰麴曰魚曰漆曰醇音教曰山澤曰蕩曰柳曰

牙例曰乳牛曰抽分曰蒲曰魚苗曰柴曰羊皮曰磁曰竹葦曰
薑曰白藥

抽分

續通考元額外課有抽分明太祖洪武二十六年癸酉定龍江
大勝港俱設抽分竹木局成祖永樂六年戊子設通州白河蘆
溝通積廣積抽分竹木五局英宗正統元年丙辰設通州抽分
憲宗成化七年辛卯設杭州荊州太平保定抽分英宗時設蘭
州抽分

設鈔關

明會典太祖洪武初止有商稅未有船鈔宣宗宣德四年己酉始設河西務臨清九江許墅淮安揚州杭州鈔關七所

夾帶私貨

周禮地官司門凡財物犯禁者舉之鄭曰舉之設入官關禁夾帶私貨本此

漏稅

司關凡貨不出于關者舉其貨鄭曰從私道出避稅者則沒其財關禁漏稅本此

編印勘合

續通考明宣宗時設漁課事例每歲南京戶科編印勘合皆以
河字爲號戶部發各該衙門收掌各記收魚課米鈔若干年終
送繳以防徵多收少之弊此則循環票簿串根存查之意

合同

國策馮煖爲孟嘗君之薛收責召諸民當償者悉來合券又韓
策或謂韓公仲曰秦操右契而爲公責註左契待合而已右契
可以責取是今之合同蓋卽周禮地官質劑之制

質劑

宋黃庭堅涪翁雜說小宰云聽賣買以質劑司市云以質劑結

信而止訟質人云大市以質小市以劑鄭康成云質劑謂兩書一札同而別之長曰質短曰劑

開市

焦氏易林開市作喜建造利事通俗編賈肆每值歲初皆揭書曰開市大利本此

放債起息

周禮園廛二十而稅一近郊十一遠郊二十而三甸稍縣皆無過十二惟漆林之征二十而五賈公彥疏謂近郊十一者萬錢期出息一千遠郊二十而三者期出息一千五百甸稍縣都之

民期出息二千也此後世放債起息之由來也

假名代放分利受謝

宋永亨搜采異聞錄今人出本規利謂之放債考之亦有所自來漢書谷永傳爲人起債分利受謝師古注富賈有錢假托其名代爲之主放與他人以取息而共分之是放債之事始于漢也

加二加三

漢書貨殖傳農工商賈大率歲萬息二千百萬之家卽二十萬此加二起息也莽傳令市官收賤賣貴賒貸與民收息百月三